

2008-imi ilassutitut aningaasaliissutissanut inatsisissatut siunnersuut

Akissuteqaat

(Aningaasaqarnermut Naalakkersuisoq)

Aappassaaneerera

2008-imi ilassutitut aningaasaliissutissatut siunnersuutip siullermeereernerata kingorna Aningaasaqarnermut Ataatsimiititaliap sulilluarsimaneranut qutsavigissavara. Aningaasaqarnermut Ataatsimiititaliap aappassaaneerinninnissamut isumaliutissiisummini apeqqutit marluk taasimasaat oqaaseqarfigilaasavakka.

Aningaasaqarnermut Ataatsimiititaliap Naalakkersuisut qinnuigai IA 2008-p inatsisartuni pingajussaaneernissaanut allannguutissatut siunnersuuteqaqqullugit meeqqanut tapiissutit 1. juli 2008-mi annertuseriaatissaanut tunngavissat suli inissineqarsimangimmata.

Naalakkersuisut tassunga tunngatillugu kontop pingaarnerup 30.10.32 Meeqqanut tapiissutini oqaasertaliussartaasa allanngortinnissaanut siunnersuuteqarnermikkut ajornartorsiutaasut aaqqiiviniarpaat, taamaasiortoqarneratigut meeqqanut tapit qaffariaataanut tunngatillugu aningaasanut killiliussat aaqqiiffigineqassallutik.

Tamatuma saniatigut Aningaasaqarnermut Ataatsimiititaliap ujarorpaa Neqi A/S-imut tunngatillugu sullissinissamik isumaqatigiissutissap pitsaassusissaata misissoqqissaarneqarnissaa, sullissinerillu pitsanngoriartinnissaanut ingerlatseqatigiiffimmik maannamut isumaqatiginninniarsimanerit pillugit paasissutissanik ujartuilluni.

Naalakkersuisut qulaakkeerniarpaat Neqi A/S-imik sullissinissamik isumaqatigiissutissap naammaginnartumik pitsaassusersiorneqarsimanissaa. Tamatuma saniatigut ilassutitut aningaasaliissutissat pillugit inatsisissap pingajussaaneerneqannginnerani Neqi A/S-imik isumaqatiginniniarnerit killiffiat pillugu allakkiortoqassaaq.

Taamatut naatsumik oqaaseqarlunga 2008-mut ilassutitut aningaasaliissutissat pillugit inatsisissatut siunnersuut Inatsisartunit akuersaartumik Naalakkersuisut suliassanngortippaat pingajussaaneerinninnissarlu qilanaarilereerlugu.